

川匪奏稟

T4664.85/275

v.1





CHINESE-JAPANESE LIBRARY  
HARVARD-YENCHING INSTITUTE  
AT HARVARD UNIVERSITY  
JUN 16 1946

奏為訪獲習教匪犯尚有要犯未獲現在分別提審緝拏

先行恭摺奏

聞仰祈

聖鑒事竊照奸民習教傳徒大為風俗人心之害川省民情浮  
動誘惑尤易查緝不容稍懈臣前因風聞道光七年獲辦  
青蓮教犯楊守一案內餘黨尚未淨盡誠恐故智復萌密  
飭各屬加意訪拏務期有犯獲究俾絕根株茲據簡州南  
充等州縣先後訪獲教匪彭汝昌等六名訊係素習青蓮





教內鄭子青一名係楊守一案內逸犯曾經陝省拏獲發遣嗣因平定西口外逆回防堵出力釋回仍復習教並據供有籍隸南部縣教犯李一沅輾轉傳徒遣令分赴湖北陝西甘肅各省傳教等情稟報前來臣以該犯等學習邪教或怙終不悛均係法不容寬更恐別有邪術煽惑及糾謀不法重情必須嚴切究審且該犯彭汝昌等習教始自何年傳自何人同夥人數若干現在何處並該犯等曾否傳徒惑衆尤應逐一根究按名嚴拏懲辦當即批飭搜查

各該犯家有無經卷圖像及違悖器物將人犯一并押解來省由臣督同臬司委員悉心確審期於水落石出至李一沅一犯轉傳多徒又復遣黨四出傳教情罪更重雖已拏獲其弟李會沅並其子李學寬到案第該犯飭拏未獲難保非聞風由湖北等省逃逸現准甘省咨會業將該犯遣出之夏長春等拏獲臣亦飛咨各該省一體飭屬截拏李一沅及其夥黨解川歸案以免日久漏網除仍通飭各屬上緊躡緝各犯務獲解省審辦外理合先行恭摺具



奏伏乞

皇上聖鑒訓示謹

奏

道光二十五年二月二十八日奏三月初三日奉

四川閣督部堂寶

於道光二十五年二月二十八日具

奏訪獲習教匪犯尚有要犯未獲現在分別提審緝拿一摺

茲於四月初十日奉到

硃批嚴行查緝不可使一名漏網欽此



奏為訪獲傳習邪教匪犯現飭嚴審究擬恭摺奏

聞仰祈

聖鑒事竊照陝省地方界連甘肅川楚外來奸匪每易潛踪節  
經臣與司道等諄飭文武各官隨時嚴密查拏不准稍涉  
疎懈茲據西安府知府咸寧長安兩知縣訪得省城西街  
新來四川游民形跡可疑即飭會營改装星夜躡緝先獲  
蕭剛一名起出經卷歌訣二十本符籙一百零一張金丹  
口訣九十八張查係供奉無生老母勸人為善俚詞並無



違悖字句訊據蕭剛供係四川仁壽縣人道光二十四年  
四月內曾在本省南部縣拜李一沅為師學習龍華會又  
名青蓮教持齋念經十一月間李一沅付給符錄令伊至  
陝傳徒酌收功課錢文伊即收徒宋會自川偕行十二月  
二十七日甫抵西安府城收蕭德尚鄧紅順為徒並勸甘  
興悅朱振瀉陳信順入教未允李一沅又令謝泳先康汰  
生周導亨王尚儉顧品良亦來陝省並令張利貞鄧三謨  
等赴漢中夏長春等赴甘肅等處傳教又聞有李一沅師

兄陳汝海郭建汶同鄧良世彭依法子范懷子在湖北武

鄧良玉

昌漢口傳教究在武漢何處伊不知道等語旋經密派兵  
役將謝泳先等十一名先後獲案搜查謝泳先等經卷五  
本與蕭剛經卷無異連日隔別研訊據供甫至陝省即被  
拏獲未及傳徒其宋會等甫拜蕭剛為師並未傳授經卷  
符錄甘興悅等亦未聽從入教又據漢中府知府南鄭縣  
知縣拏獲張利貞鄧三謨苟雲喜谷善修黃三固上一張  
清江何春成劉裁縫即劉升趙裁縫即趙玉清等十名並



經卷書籍佛象帳簿各等情稟報前來臣查習教傳徒大  
為風俗人心之害今該文武各官訪獲蕭剛等多犯並經  
卷符錄各件既經訊有教會名目蕭剛已認傳徒其被誘  
之人當不止於此數即現供或未傳徒或未入教亦難保  
無飾詞且李一沅又遣夥黨分赴各省更難保無另有不  
法情事其師兄陳汶海等現在湖北傳教有無分途煽惑  
究竟居止何所始自何年徒黨何人均應根究明確密咨  
速拏以期除惡務盡所供夏長春等一起接准甘肅咨會  
業經拏獲審辦其漢中張利貞等一起情節小異亦據解  
省委審容臣督飭嚴切究追據實擬辦並飭各州縣迅加  
躡訪暨飛咨四川湖北兩省一體飭緝李一沅陳汶海等  
務俾按名就獲外所有訪獲傳習邪教匪犯現辦大概緣  
由先行恭摺具

奏伏乞

皇上聖鑒訓示謹

奏

三月初八日奏三月二十日奉



陝西撫部院李

於道光二十五年三月初八日具

奏訪獲傳習邪教匪犯現飭嚴審究擬緣由一摺茲於三月

二十九日奉到

硃批查辦甚好嚴行根究毋致縱脫欽此



奏為現獲傳習邪教匪徒續經審有端倪並隔省要犯請  
旨密飭分別查拏仰祈

聖鑒事竊臣先據西安府咸寧長安兩縣稟報訪獲傳習青蓮  
教犯蕭剛謝泳先等十二名當即飭委嚴訊旋據漢中府  
南鄭縣訪獲張利貞鄧三謨等十名六飭解省併案審辨  
業經恭摺具

奏在案臣以該地方官兩起獲犯多至二十餘名既有經卷  
符訣來自四川牽及他省教首究在何處徒黨究有若干

有無糾謀不法重情亟應研訊確實密速咨拏無使奸徒  
漏網疊經飭司督同府縣及委員覆加隔別鞫審始據蕭  
剛謝泳先鄧三謨同供拜從四川人李一原為師李一原  
即依微子素習青蓮教以達摩為初祖供奉無生老母自  
號五行十地佛教令伊等坐功運氣并各給與銀錢分赴  
陝省廣收徒眾酌取功課錢文今年四月好來收圓普度  
將赴龍華三會隨後又令蒲保得至漢中取銀三十兩及  
寶錄符訣送交甘省夏長春收用李一原上年從漢口回



說他帶同夏長春到湖北武昌府會遇陳汝海等商議復  
教曾在東門外長春觀做道場并在漢陽府孟家巷設壇  
名紫微堂是為雲城又在武昌府洗馬池改立新壇議事  
屢請袁祖降乩示有收圓普度小陽期約及寶光寶錄各  
件因以法精成秘道為先天五行元微專果真為後天五  
行又添溫良恭儉讓為五德以先天五行為內五總持壇  
事其後天五行與五德即為外十分掌十地如陳汝海即  
公大爺號依精子彭超凡號依法子林舟觀號依成子郭  
建汝號依光子並鄧良玉鄧良士鍾守章李一原為八人  
還有二人未說名姓止知李一原掌四川陝甘為一地此  
外都不知道李一原又說他教中有頂航引恩保恩證恩  
添恩各名次又說陳汝海彭超凡在湖北黃鶴樓與周蠻  
設道周蠻教內有金冠雲履五佛冠仙衣壽帶古今無此  
教名等語其餘各犯據供或習教傳徒或習教而未傳徒  
或同行而未習教核與甘省咨會夏長春供詞大同小異  
質之鄧三謨等僉供夏長春曾隨李一原親到湖北伊等



未經同往故不能詳是陝甘此次獲犯皆由李一原分途  
密遣展轉煽惑其為此案教首斷然無疑惟訊據張利貞  
供原名周位掄湖南清泉縣人道光十三年拜呂文炳為  
師演習坐功運氣亦以達摩為祖至十二世為袁祖袁祖  
以後即與李一原所習分派奉的添弟會教職居頂航自  
號摘光祖師陸續傳徒無多二十三年正月在漢口坐靜  
出神忽見天有白光知人遭劫遂造金冠雲履仙衣壽帶  
七星寶劍并畫蘭草又寫龍虎二字以降妖魔曾與陳汶  
海彭超凡在黃鶴設道彭超凡說他們八牛教主是彌勒  
佛轉世名叫朱普明現在漢陽府西門外皈元寺藏經閣  
內翠微峯總持勸令隨他入教因其道真人假好講符籙  
彼此兩不相下就往卧龍岡避難百日改姓名為張利貞  
上年八月始到漢中府城收胡體乾為徒得功課錢一百  
四十千文哥子固上一即周位猷侄子張清江即周榮正  
亦知用功并沒講究何春成是從哥子學生意的等供質  
之固上一張清江何春成供亦相同臣查該犯張利貞既



認傳教不諱又云各行各教就鄧三謨等所供周蠻在湖北設道不合即指張利貞而言亦似非李一原夥黨且起出金冠雲履各件其經卷抄本尤多中如推背圖東明律風輪經九蓮寶讚托天神圖無上妙品等書非語涉悖逆即事近妖邪實屬人中鬼蜮即鄧三謨一犯所藏普度規條內以雲城斗牛宮為開道根基又有王法當權佛法未顯應宜檢密隨行暗釣賢良數語又此詩內有三豕遇龍八牛逢犬等句較蕭剛謝泳先等所藏經卷殊屬狂謬絕倫溯查道光八年川陝教匪案內徐蘭為內盤楊守一為外盤均經照律治罪現據各犯供詞明係徐楊流毒如湖北陳汶海即前案發遣釋回之犯內皆假稱兵火妄托鬼神以劫難之危詞遂煽誘之私計誠為人心所同嫉即為國法所難容至李一原首佈妖言陰謀惑眾陳汶海彭超凡郭建汶等主壇立教詭稱總辨收圓大事此鄧三謨等所指為宗派亦張利貞等所視為爭端若非迅緝兜擒寘之重典何由根株立盡萌蘖不生除仍飭提各犯徹底根究



併節次飛行各屬及隣省隨時隨地設法偵緝務獲外相應請

旨飭下四川湖北兩省密拏李一原陳汝海等到案嚴審究追俾各水落石出盡法懲艾以防株累而絕蔓延所有續審供情謹據實縷悉上

聞伏乞

皇上聖鑒訓示謹

奏

三月十九日奏四月初五日奉

陝西撫部院李 於道光二十五年三月十九日具

奏現獲傳習邪教匪徒續經審有端倪並隔省要犯請

旨密飭分別查拏緣由一摺茲於四月十二日奉到

硃批另有旨并於至李一原首佈妖言陰謀惑衆陳汝海彭超

凡凡郭建汝等主壇立教詭稱總辦收圓大事向上奉

硃批此鄧三謨等所指為宗派亦張利貞等所視為爭端向上奉

硃點欽此



奏為省會地方訪獲習教傳徒匪犯訊明大概供情並飛  
咨各省查拏首要各犯緣由恭摺奏

聞仰祈

聖鑒事竊

臣

先據皋蘭縣知縣李淳稟報正月十三日訪聞縣

屬東街康喇嘛廟內有潛住四川人夏姓習教傳徒之事

當即會同營委各員先後拏獲夏長春毛智源陳禮趙金

信張洪貴陳正倫設芝恁周中禮趙洪順代曾三范汶恁

宋遇蒲保得等並起出符籙經卷書信等件訊據供稱該



犯夏長春毛智源陳禮先曾同拜習龍華會之四川南部  
縣人李一元為師供奉無生老母名為青蓮教嗣李一元  
分派夏長春毛智源來甘傳教先後收徒設芝怔周中禮  
張洪貴陳正倫趙洪順代曾三六人入會吃素誦經毛智  
源旋即回川措資李一元復令陳禮趙金信范文怔來蘭  
與夏長春致送銀信囑為廣收徒眾歛費寄川其宋遇蒲  
保得係派在漢中傳教之鄧三謨使令來甘寄送銀信之  
人等情稟報前來臣查該犯夏長春等遠道奔馳廣招徒

眾斷非止圖歛錢別無詭計且檢閱起獲經卷內有斗牛  
宮普度規條靈犀玉璣璇各一本所載無生老母降乩之  
語率多荒誕悖謬又其來往書信俱有雲城字樣究係何  
指均須澈底究明當飭在省司道督率該管府縣詳加究  
詰始據該犯夏長春等供稱李一元道號李依微先於道  
光二十三年與彭起凡即彭依法等在湖北漢陽府城外  
孟家巷設壇請乩因稱漢陽為雲城壇名紫微堂係請無  
生老母降乩以同教之湖南長沙人朱姓應成大道普度



衆人因賜朱姓法名中立道號化無又以其姓朱取八牛  
為暗號是年十二月李一元等復於武昌府洗馬池設立  
新壇即以朱中立為總教主又以彭依法等五人為先天  
內五行俱在湖北掌管雲城洗馬池兩處壇事葛依元等  
五人為後天陰陽五行夏致溫等五人為五德與葛依元  
等並稱十地天總分往各省傳教內李一元即李依微係  
四川兼陝甘教主現住原籍南部縣夏長春等因李一元  
告知如能入教誦經分赴各處傳授徒衆即可避灾獲福  
夏長春等信實應允入教嗣李一元以所管四川陝甘分  
列為七號將甘肅一號派令夏長春毛智源與同教之唐  
守中吳應魁鍾永鎰五人前往傳教如收得資財即寄回  
川省由李一元轉送雲城老壇使用俟夏長春等收獲徒  
衆計普度多寡再由李一元薦引雲城按功錄用夏長春  
等隨於二十四年七月從南山僻路行抵蘭州省城住宿  
城外空廟假以行醫為由先後收獲徒衆內設芝叵周中  
禮張洪貴陳正倫四人俱拜夏長春為師趙洪順代曾三



二人拜毛智源為師夏長春等旋移至城內東街康喇嘛廟內寄住因收徒不多費用無出當令毛智源與唐守中等回川取銀接濟適李一元派往漢中傳教之鄧三謨旋令入教之宋遇蒲保得來蘭與夏長春寄送銀信並符籙五十張云係由湖北壇上傳寄雷唵二偈分佩可禦災難嗣李一元復令毛智源與同教之陳禮趙金信范汶怔來蘭寄送銀信仍囑夏長春廣為收徒斂資夏長春即留宋遇毛智源等在廟同居二十五年正月夏長春因省城耳

目衆多難以輾轉傳徒正擬分遣毛智源陳禮潛往涼州寧夏一帶傳教即經該縣等訪聞獲犯此夏長春等聽從李一元入教來蘭傳徒之大概供情也正在審辦間接據陝西撫臣李知會西安省城於二月間查有由川來陝形跡可疑之蕭堦等十二人現經究出均係習教匪徒並有在漢中之夥犯鄧三謨業經南鄭縣訪獲等語臣查核陝省各犯姓名內鄧三謨一犯曾據夏長春供指則其餘皆係同教夥匪無疑除抄錄甘省犯供函致撫臣飭屬研鞫



究辦外臣查此案該犯夏長春等供指教犯李一元等胆  
敢於光天化日之下設壇傳教倚托鬼神妄言禍福甚至  
共稱朱中立為總教主暗以八牛為號輾轉煽誘蔓延各  
省實屬狂悖必須嚴拏窮究盡絕根株以為世道人心之  
防臣現已照依夏長春等供出各犯住址姓名飛咨四川  
湖北等省一體嚴密查拿首要各犯朱中立李一元等務  
獲確審一面督飭司道等再行提集現犯嚴切鞫訊務得  
如何習教傳徒並有無謀為不軌情事按律定擬另行具

奏以伸

國法而正人心所有省會地方訪獲習教傳徒匪犯訊明大  
概供情並分咨各省查拿首要各犯緣由謹先恭摺

奏

聞伏乞

皇上聖鑒謹

奏

四月初五日奉



奏為傳習邪教匪犯復經續獲多名先行訊取大概供情  
恭摺具奏並請

旨飭下湖北江南等省嚴拏首要教犯懲辦以免流毒而杜後  
患仰祈

聖鑒事竊臣前因飭據簡州南充等州縣訪獲傳習青蓮教匪  
犯鄭子青等六名供有傳教要匪李一沅一犯未獲當經  
恭摺

奏報並飛咨陝甘等省緝拏一面飭將鄭子青等解省審訊



續又節據華陽縣拏獲何惇暢等六名成都縣拏獲何惇  
杰等四名委員璧山縣知縣李玉台會同南部縣拏獲宋  
應魁等二十六名簡州拏獲王化心等七名西充縣拏獲  
王剛等五名先後訊取供詞稟報到臣均經批飭解省統  
計先後獲犯共五十四名臣以該教匪等夥黨衆多究竟  
習自何年傳自何人教首係何姓名現在何處各該犯等  
各已傳徒若干曾否出省傳徒亟應確訊緝究隨與臬司  
潘督同委員就已到各犯究訊多日該犯等供詞烟爍  
狡不吐實復又節次催提未到各犯來省連日悉心推鞫  
始據鄭子青供伊向拜方存敬為師學習青蓮教供俸無  
生老母道光七年因教犯楊守一等破案被獲懲辦伊逃  
至陝西六被拏獲擬遣後因防堵西口外回匪出力釋回  
仍復習教與同教之南部縣人李一沅素識往來上年李  
一沅稱其與陳汶海即陳依精在湖北漢陽府城外孟家  
巷及武昌府洗馬池設壇請無生老母降乩示令各處傳  
徒復教並稱如今彌勒佛轉生朱家現在總教主姓朱名



中立在湖北掌教又暗號八牛未末申初之年應當成佛  
教內分批等次第一等係陳汝海即陳依精彭依法林依  
秘葛依元等為內五行同在湖北傳徒第二等名十地在  
各省掌教李一沅掌四川陝甘為一地第三等為一百零  
八盤分往各省傳徒俟朱中立道成之日凡係五行十地  
及傳徒習教諸人均可大獲好處夏長春蕭剛等與伊同  
在一百零八盤之內李一沅曾令伊赴陝傳教伊因脚疾  
不能遠行遣子鄭嘉倫與徐學忠同往陝西旋以人地生  
疎不及傳徒轉回伊只在家傳得汪德洋彭汝諄兩人其  
彭汝倡王心喜兩人僅止隨伊吃素至各省傳徒掌教之  
人伊不能記憶姓名是實訊之吳懷琦鄭嘉倫徐學忠及  
何惇暢何惇杰並汪德洋等供各大畧相同其林洪春朱  
訪名張大鵬等供止拜師吃素張世欽則稱習教並未傳  
徒盧學輔鄧一方曾成賓各供習教未成或止隨同何惇  
暢等赴陝還愿不知習教之事內有王化心一犯即係赴  
甘傳徒被獲教犯毛智源之師詰訊該犯堅供毛智源如



何赴甘伊不知情並據各該犯等僉稱伊等習教委止意在邀福消災並無不法別故臣因該犯現供傳徒掌教各省皆有究係何人掌教何省焉有一概遺忘不能記憶之理復向究詰各該犯等供仍如前惟據吳懷琦供稱僅記有范秉書其人係屬江南教主其餘委不復記等語查閱起獲該犯等經咒信稿皆係荒誕鄙俚之詞內有綾書經句一節係在吳懷琦身間搜獲所錄有十報十懺三皈五戒等語俱稱即係無生老母經文各該犯等多能背誦詞尤鄙俗均尚無悖逆不法語句第該犯等聽從邪教或輾轉傳徒果止意在邀福何致夥黨如此之衆且王化心一犯節次嚴行熬訊神色不變該犯於各犯中習教最早難保非別有邪術况此案設壇復教起自湖北分布各省而李一沅一犯詭托神鬼之言於四川陝甘三省肆行煽誘其意何居履霜堅冰若不趕緊捕拏盡絕根株其為害於世道人心誠非淺鮮該犯之弟李會沅及子李學寬前已拏獲其遣出之徒黨夏長春蕭剛等亦經甘肅陝西知會



破獲多名現據川北道胡興仁探稟李一沅逃往重慶一帶縣匪經該道專丁馳往躡拏臣復飛飭巴縣密速緝擒務在必獲不得任其漏網除再提齊各犯澈底究審務期水落石出盡法懲創另行具

奏並仍飭各屬嚴緝其餘同夥各犯解省歸案外相應請旨勅下湖北江南等省迅速緝拏朱中立等及范秉書到案嚴審究辦以免流毒而杜後患理合先行恭摺陳

奏伏乞

皇上聖鑒訓示謹

奏

四月初六日奉



軍機大臣字寄大學士四川總督寶 陝甘總督富 調

任陝西巡撫李 陝西巡撫鄧 湖廣總督裕 湖北巡

撫趙 道光二十五年四月初二日奉

上諭奸民習教傳徒造言惑衆最為風俗人心之害必應嚴行懲辦淨絕根株前據寶興富呢揚阿李星沅各奏訪獲青蓮教匪查辦情形均令嚴密拏究毋稍疎縱本日復據李星沅奏訊明現供情由四川素習青蓮教之李一原分途密遣展轉煽惑又據裕泰等奏緝獲犯<sup>匪</sup>陳依精<sup>等</sup>亦供有李一原勸令

喫齋扶乩騙錢之語是李一原佈散妖言轉傳徒衆實為此案教首現雖據川省拏獲其弟及伊子到案而該犯聞風潛竄著各該督撫嚴飭所屬無分畛域迅速兜拏務須剋期弋獲盡法懲治至陳汝海彭超凡郭建汝等主壇立教詭稱總辦收圓大事實屬法所難容亦著一体嚴拏毋任縱脫其現獲各犯即著研訊確供按律定擬不准稍有避就以至不實不盡至湖北所獲之犯供出商同習教各姓名有籍隸湖南江南雲南之人又有逃往山東河南江浙等省之說即難保



李一原等不依其同類潛匿各省著該督撫再行確訊何人籍隸何省並根究李一原等確蹤飛咨各該省按照匪犯姓名通行搜緝一律究辦毋得稍有遲延致有一名漏網其捏投假信輒行潛逃之張蔚澤並著裕泰等究明拏辦將此各諭令知之欽此遵

旨寄信前來

奏為拏獲首要教犯恭摺具奏仰祈

聖鑒事竊臣前因先後捕獲習教匪犯五十餘名當將訊取大概供情繕摺

奏報並聲明教首李一沅逃赴重慶一帶躲匿飭令巴縣密速緝擒在案嗣又據各屬陸續稟獲夥犯李喜悅等數名而李一沅未據就獲臣以除惡務盡該犯一日不獲即根株一日不清况其夥黨衆多分布各省若閱時稍久誠恐遠颺出省查緝更難得手隨復懸立重賞通飭各道府廳



州縣毋分畛域勒限上緊嚴拏其與憐省毗連各屬闕隘  
尤應認真盤詰俾免乘間逸出務期必獲茲據嘉定府知  
府邵勣署樂山縣知縣范涑清稟稱李一沅變易姓名逃  
入縣境經該縣府訪聞立即會營督率縣府及巴縣犍為  
各處兵役人等將李一沅拏獲並獲隨行之王春元王明  
寬王陳氏陳陳氏張陳氏等五名口起出修真寶傳等經  
卷十本紙符書信十六件木劍鐵劍各壹把到案訊據李  
一沅供認向習青蓮教總管四川陝甘三省傳徒誘人入  
教因聞拏嚴緊改姓名為王泰與其徒王春元王明寬等  
由重慶逃至被獲訊之王春元等供亦相同其王陳氏等  
訊係王春元等眷屬等情到臣覆查該犯李一沅膽敢與  
陳文海等在湖北假托神鬼之詞設壇復教編立五行十  
地等項名目自為四川陝西甘肅三省行教之首造捏邪  
言肆行煽惑並遣其黨四出傳徒蔓言各處大為世道人  
心之害實屬罪不容誅今破案未久即經拏獲不致倖逃  
法網實堪大快人心現在已據該府邵勣委員將該犯等



押解來省除即督同臬司委員等提齊先後所獲各犯嚴切究訊明確另行定擬具

奏並仍飭各屬緝拏餘黨一律究辦以免流毒外所有拏獲首要教犯緣由理合恭摺具

奏伏乞

皇上聖鑒謹

奏

五月初六日奏五月初九日奉

四川閩督部堂寶 於道光二十五年五月初六日具

奏拏獲首要教犯一摺茲於六月十七日奉到

硃批另有旨欽此並於將李一沅拏獲句旁奉

硃批好極欽此道光二十五年五月二十七日內閣奉

上諭寶 奏拏獲首要教犯一摺四川省教首李一沅前因逃

往往重慶一帶經該督飭屬嚴拏茲據奏稱該犯變易姓名逃入樂山縣境經該地方文武員弁督率兵役將該犯立時拏獲所辦甚好該犯李一沅為四川陝西甘肅三省行教之



首分遣其黨四出傳徒蔓延各省實屬罪不容誅著該督親  
提嚴訊其習教傳徒始自何年徒黨究有若干現在藏匿何  
省務令確切供指毋任狡展致有不實不盡並著提同現獲  
各犯嚴切根究毋留遺孽所有未獲餘黨仍著該督飭屬分  
路躡緝以淨根株欽此

小見  
硃批

奏為訪獲傳習邪教匪徒審訊大概供情現飭嚴拏餘犯  
澈究懲辦恭摺奏祈

聖鑒事竊臣裕於本年二月間訪聞湖北武漢地方有外來  
匪徒設壇扶乩傳徒歛錢之事當經諭飭該府縣慎密查  
拏旋有湖南善化縣人張蔚澤即張善將伊所具呈詞捏  
作楊姓家信投遞臣裕署內飭查張蔚澤於遞信後即  
行潛逃拆閱信內係四川省有葛彭陳林等姓素慣符法  
扶乩惑人原定十依派名續添五致分往各省傳徒該犯



被迷入教得疾旋歸後經省悟至漢口細詢聞陳依精欲  
回四川林依秘又往三江憾難全獲首惡開單呈請拏究  
其清單內開彭依法陳依精安依成林依秘劉依道葛依  
元李依微朱依專蕭依果雷依真夏致溫謝致良黃致恭  
張致儉即張蔚澤等名目註明均係湖北湖南四川江南  
雲南等省人妄托聖賢仙佛臨凡又木匣一箇內貯抄錄  
該匪等條規二本大率勸人修道可以消災獲福不遭水  
火劫難荒誕不經語句復嚴飭查拏去後茲據漢陽府知

府夏廷楨漢陽縣知縣趙德輒會同營員並武昌府縣在  
於蕭家塘劉王氏家空屋緝獲陳依精安依成宋潮真即  
宋依道又名宋致恭黃尚元王德浦即王持建及房主劉  
王氏並起獲大小神像二軸雲城規條四卷到案訊據陳  
依精供稱原籍湖南善化縣人自幼在四川居住道光八  
年因習教犯案發遣烏魯木齊過後逆回滋事隨同打仗  
出力釋回二十四年十一月該犯同安依成宋潮真來至  
至漢陽會遇素識之林依秘黃致恭即黃克立共設窮苦



該犯因四川人李一沅素習青蓮教曾勸喫齋商允符乩騙錢隨隱匿真情向劉王氏租住空屋並將無生老母捏稱瑶池金母請不識姓名人畫出神像二幅懸掛供俸乘間勸人喫齋求福因無人相信尚未傳徒即被訪獲至素識之彭依法已往湖南張致儉謝致良朱依專李依微葛依元等現在山東河南江浙四川等省林依秘黃致恭亦不知逃往何處據安依成宋潮真即宋依道黃尚元王德浦即王持建供俱係湖南善化縣人或認聽從陳依精喫

齋勸人扶乩或供僅止受雇炊爨隨同喫齋據劉王氏供係誤信租給空屋並非知情容留各等供開單呈送正核辦間准陝西撫臣李咨會拏獲習教之蕭剛等案內供有郭建汶彭依法等在湖北漢口傳教又准陝甘督臣富咨獲犯夏長春等亦供有陳依精安依成等係屬同教分往各省傳徒歛錢等因核與張蔚澤所呈單內名目大畧相符臣等查傳習邪教大為地方之害該犯陳依精等既有字派分往各省傳徒必有主持為首之犯據供各自



起意祇圖扶乩歛錢顯係狡供避就至捏投假信之張蔚  
澤如果入教後業經改悔何以不候傳訊輒復潛逃行踪  
尤為詭譎亟應確究夥黨速拏務獲盡法懲辦以絕根株  
而免滋蔓除嚴飭湖北所屬各州縣並飛咨湖南四川等  
省督撫臣一體認真訪緝毋任漏網外所有訪獲習教匪  
徒審訊大概供情理合先行恭摺具

奏伏乞

皇上聖鑒訓示謹

奏

三月十九日奏五月初十日奉



奏為續獲習教從犯並究出夥黨潛匿處所分別飛咨緝  
拏恭摺奏

聞仰祈

聖鑒事竊臣裕前經訪獲習教匪徒陳依精等查訊供詞狡  
展當將大概情形會摺

奏報在案茲復飭據武昌漢陽等府督縣續獲張善成徐元  
中藍寬怒駱德春即駱老五胡吳氏等五名口先在陳依  
精等寓所搜獲銅劍一把銅鏡三面此架二分降香一枝

並龍華楞嚴等經解二十本及零星抄字畫符信件雖語

多荒誕查明尚無違悖字句訊據張善成供江蘇吳縣人徐

元中供湖北江夏縣人藍寬怒供湖北黃陂縣人均認拜

從安依成為師張善成在家設立佛堂同徐元中朔望拜

佛禮仍坐功運氣張善成並給過安依成銀五十兩藍寬

怒先在張善成家炊飯後亦聽從入教喫齋駱德春供漢

陽人聽從葛依元即郭建汶入教喫齋打坐運氣胡吳氏

供漢陽縣人係胡本即胡克煌之妾亦曾隨胡本入教喫



齋屬實隨提陳依精安依成等質訊無可狡賴始據供認  
該犯等先在四川會遇素習青蓮教之李一沅即李依微  
林依秘即林祝官葛依沅即郭建汶說起都在四川傳有  
徒弟因所傳不多恐在一處易於破案大家商議分往各  
省傳教收徒騙取銀錢必須扶乩判出字派方好傳習隨  
於道光二十三年二月內同到湖南善化縣地方請得江  
南人劉依道設壇扶乩定下字派是元秘精微道法專真  
果成十字都用依字加首名為十依又定致溫致良致恭  
致儉致讓五名因恐人多名字不敷又添克持二字共十  
七字派又分出內五行五人專管乩壇外五行五人同五  
致字為十地分往各省傳教都託乩筆扶出迨後李一沅  
就仍回四川派人到陝甘兩省傳徒該犯陳依精與安依  
成宋依道等一同來到漢陽捏說貿易租住劉王氏空屋  
設立乩壇懸掛前已起獲之無生老母畫像扶鸞禱聖假  
託聖賢仙佛轉世勸人吃齋行善可以獲福延年不遭水  
火劫難藉以騙錢凡習教之人必須先在神前盟誓後若



改悔定遭雷劫又傳授打坐運氣法則將住屋稱為雲城又名紫微堂並傳令現獲之張善成徐元中藍寬怒王德浦即王持建黃尚元等五人入教從學寫給仍語陳依精扶乩批判又有同教之彭依法收徒朱中立即朱化無又號八牛係長沙縣人現已回家並未再來還有原派浙江的葛依沅即鄧建汶原派山東的張致儉即張蔚澤因與該犯等彼此不睦張蔚澤改教葛依沅不知去向復改派鄧依沅同詹乾沅王千祥到浙江徐致儉到山東至劉依道因未獲利已改教回去是宋朝真頂其名字其餘朱依專即柳清泉林依秘即林祝官到江南鄧依真即鄧良玉到廣西范依果即范臻到江西夏致溫到雲南謝致良即謝克畏徐傳貴文先覺鍾大環到河南張致讓即張克廣彭依法到湖南傳教其貴州地方由雲南派去廣東由廣西派去福建由浙江派去江蘇由江南派去安徽由江西派去直隸由河南派去山西由山東派去說明傳教後互相照應接濟銀錢彼此轉寄幫助又同教有名之十五人內胡本即胡克煌又名胡克立



已於上年十一月內病故伊妾吳氏亦曾吃齋現已獲案  
又余克明即余上達是江西德化縣人已於上年八月內  
病故此外各犯行踪住址該犯等有知道的俱逐細供明  
不敢再行諱飾等供臣等查此案陳依精本係四川省前  
獲習教案內擬遣之犯乃於釋回後不知悛改復聽從四  
川南部縣教匪李一沅等指使商同傳教假託聖賢仙佛  
轉世扶乩降神妄稱五行十地分定字派潛至漢陽等處  
傳徒歛錢復遣其黨分赴各省惑人實屬居心巨測懲不  
畏法而朱中立一犯並有八牛名號竟與從前牛八教相  
類九屬狂悖雖據供現已回家殊難憑信且恐所供人數  
尚有不實不盡亟應跟蹤掩捕速獲懲辦以儆邪慝而淨  
根株至陳依精犯案發遣後是否在軍營出力奉

赦釋回應並咨川省查覆核辦除湖南一省臣等現已遴委幹  
員前往會同各該地方官按名查拏解北質究並將供出  
各犯開列年貌住址飛咨湖南撫臣暨各省督撫臣一體  
嚴密查拏務獲究治外所有續獲教匪究辦緣由理合繕



具名單恭呈

御覽伏乞

皇上聖鑒謹

奏

三月二十六日會奏五月十九日奉

奏為訪獲習教傳徒匪犯訊明大概供情並飛咨各省查  
拏首要各犯緣由恭摺奏祈

聖鑒事竊照杭城地方商賈輻輳五方雜處奸究最易潛踪節  
經臣嚴飭地方文武實力查拏茲據仁和縣知縣余士璫  
署錢塘縣知縣甘鴻稟稱四月初六日訪有教匪鄧依沅  
等以施醫為名在江干潛匿當即會同改装易服前詣閘  
口地方盤獲鄧依沅詹澣沅二名適有台州府同知劉秩  
奉臬司委查保甲及營汛委員巡緝至彼一同協獲並在



該犯等寓內搜出桃木小劍一把硃符一道梵王經威德  
咒各一本訊據鄧依沅即良仕供四川南部縣人道光二  
十<sup>四</sup>年二月間在湖北漢陽地方會遇陳依精說起他在青  
蓮教又名龍華會教頭朱中立名下掌壇勸伊入教可以  
騙錢伊就拜陳依精為師傅授無生老母口訣伊送給陳  
依精洋錢一圓至十二月間陳依精以派定浙閩傳教之  
余克明因事由湖北逕回江西德化原籍改派該犯給與  
桃劍硃符經咒帶同余克明徒弟詹澣沅來浙于本年二

月二十九日至杭旋經誘令王一清拜詹澣沅為師入教  
即被拏獲並稱該犯由楚來浙雇有王千祥跟隨已在途  
因病轉回等語質諸詹澣沅供亦相同即經捕獲王一清  
到案供係杭州人因病被誘入教屬實檢查經咒內均係  
荒誕鄙俚之詞尚無違悖不法字句臣查奸匪習教傳徒  
始而斂錢聚眾姦淫邪盜靡惡不為迨煽惑既多難保不  
謀為不輒流毒誠非淺鮮亟應從嚴懲辦以絕禍胎此案  
鄧依沅係四川奸民在湖北習教輒敢遠至浙江煽誘實



屬不法其立教究竟始於何日傳徒共若干人現供殊難  
憑信當即飭令杭州府提案研鞫該犯等供情閃爍連日  
訊究仍復狡執正在審辨間旋准陝甘督臣富咨會拏  
獲教匪夏長春等供稱朱中立為總教主又准湖廣督臣  
裕咨會拏獲教匪陳伊精供出該犯鄧依沅現在閩傳浙  
教詹澆沅係鄧依沅帶往等語核與現訊犯供約畧相同  
是該犯等為一夥匪徒毫無疑義除飛咨陝甘四川湖北  
江西福建等省查拏首要各犯朱中立等務獲一面飭令  
臬司督同委員再行提犯追究夥黨及被誘匪徒究有若  
干悉數弋獲嚴審習教傳徒確情有無謀為不輒情事盡  
法懲辦以儆邪慝而正風俗所有訪獲習教傳徒匪犯緣  
由理合恭摺奏

聞伏祈

皇上聖鑒謹

奏

六月十四日奉



奏為續獲習教案內夥黨提同現犯審訊供情先行恭摺

覆

奏仰祈

聖鑒事竊臣等承准軍機大臣字寄道光二十五年四月二十日

奉

上諭據寶 奏續獲邪教匪犯訊取大概供情一摺四川省前

前獲青蓮教匪犯因有要犯李一沅未獲曾經降旨嚴密查  
拏茲據該督奏續獲匪犯多名據鄭子青供稱現在總教主



姓朱名中立在湖北掌教暗號八牛並據吳懷琦供稱有范秉書其人係屬江南教主等語著湖北江南各督撫飭屬嚴密查拏朱中立范秉書務獲嚴審究辦至王化心一犯業經節次熬訊神色不變仍應設法嚴究令其據實供吐毋任狡展所有李一沅一犯既據查明逃往重慶一帶自應上緊緝拏其餘供出各要犯務須按名弋獲以淨根株不准稍留餘孽將此各諭令知之欽此遵

旨寄信前來等因承准此臣等查此案前經獲犯陳依精即陳

汝海等訊認係在湖北傳教惟有未獲之朱中立即朱明先一犯據陳依精等供係湖北沔陽州人經同教之彭依法即彭超凡招收為徒並未派為總教主已將其家屬拏獲到案核與陝甘等省來咨教犯夏長春等所供朱中立為總教主係湖南長沙人籍貫情節均不相符當將大概供情並開列分往各省傳教之匪犯名單三次繕摺奏報一面分咨通緝並咨會陝甘等省訊取夏長春等確實

供詞移覆核辦在案旋准軍機大臣字寄欽奉



上諭著臣等再行確訊匪犯姓名通行搜緝毋致一名漏網其所供湖南教犯彭超凡張致讓等務須獲案究辦毋稍縱脫各等因欽此復飭據江夏縣續獲林興業劉罄宣二名沔陽州掣獲易茂謙王隆盛劉名成李璜林四名黃梅縣掣獲王千祥一名襄陽縣掣獲歐陽驥張會東彭秉澗余祥太四名並湖南省前獲之黃致恭等九名亦已解到統計先後獲犯五十餘名口隨飭發在省司道府等隔別研訊據陳依精供認該犯實係湖北傳教為首之人安依成宋依

道一同設壇惑眾黃致恭係拜安依成為師轉傳陳邦定等多人其餘各犯或聽從入教輾轉傳徒或僅學咒語並未妄布邪言或拜師茹素未經傳習符咒或甫經被誘尚未拜師等情開摺呈送臣等親提研訊各供前情無異查該犯陳依精在湖北傳教已據自認為首安依成宋依道黃致恭等均屬同惡相濟供詞甚為確鑿本可先行擬辦惟所供朱中立並非總教主乃陳依精一面之詞未足深信且經臣等提訊前此呈首之張蔚澤據供前在雲城乩壇



見是安依成扶乩判出要八牛安壇云此人乃彌勒佛轉  
世後來彭依法領伊表弟朱明先入教取名中立又名化  
無因此人既無品貌又無材力家道貧窮衆人亦不推重  
並令其主壇隨又扶乩判出令朱中立另行找尋主壇之  
人質之安依成陳依精等據供朱中立年紀本輕當入教  
時彭依法曾托安依成照應栽培是以故作乩語稱讚使  
其高興習教並未派為總教主朱中立亦即於上年七月  
內回家詰以該犯既非教主何以各省獲犯俱為供指據

陳依精等供上年春間李一沅並李一沅之徒現在浙江  
傳教之鄧依沅均先到過此處曾知扶乩判出要八牛安  
壇之事或是李一沅等藉此捏造傳說騙人入教亦未可  
知各等語是朱中立果否係屬教主抑係該犯等捏造妖  
言尚無確切指証應俟陝甘等省咨覆並緝獲朱中立到  
案質究明確按律辦理俾成信讞至彭依法即彭超凡係  
同張致讓即張克廣在湖南省傳教現准湖南撫臣陸費  
函稱已在武陵縣地方將張致讓拏獲其彭依法亦據委



員訪有蹤跡現在跟追跣緝又在逃之葛依元即郭建汶  
一犯訊據陳依精等供係四川樂山縣人遷居瀘州近城  
地方因與同教之人不睦業已另自為教現在想已潛逃  
四川林依秘即林祝官係四川叙州府人前往江南傳教  
不知現逃何處又四川省掣獲之吳懷琦供有范秉書係  
江南教主詰據各犯供稱同教內只有范臻即范依果又  
名范品書係往江南<sup>西</sup>傳教於本年二月內回至湖南省城  
病故並非江南教主其范秉書或即係范品書音同字異  
之訛等語所供是否實情除移行湖南省確切查覆仍嚴  
飭各屬不分畛域查拏朱中立等及有名各要犯務獲歸  
案究辦並咨明四川督<sub>臣</sub>一體查緝外所有續獲夥犯審  
訊供情謹先恭摺覆

奏伏乞

皇上聖鑒謹

奏

道光二十五年五月十一日奏六月二十三日奉



湖廣督部堂裕  
湖北撫部院趙

於道光二十五年五月十一日會

奏續獲習教案內夥黨提同現犯審訊供情一摺今於六月

初六日奉到

硃批認真查緝斷不可使一名漏網欽此

七月二十一日奉

奏為續獲邪教案內夥黨提同前獲各犯審有端倪並究  
出入教名簿分別咨行查緝恭摺奏

聞仰祈

聖鑒事竊臣裕前經訪獲習教匪徒陳依精等審得同教各  
犯姓名住址分咨各省並委員馳赴湖南及北省各屬會  
督地方官嚴密查拏一面將大概供情會同臣趙兩次

恭摺

奏報在案嗣臣等以此案先後接准陝甘督撫臣咨會據教



犯夏長春等供川省教匪李一原曾於道光二十三年在湖北漢陽縣孟家巷同彭超凡等請無生老母乩訓判云天下有水火大劫算到湖南長沙人朱姓應成大道可以普度衆人賜名中立為總教主因是姓朱取八牛暗號現在武昌洗馬池安壇傳教又周位掄即張利貞供曾與陳汝海彭超凡等在黃鶴樓設道彭超凡說八牛教主是彌勒佛轉世名叫朱普明現在漢陽府西門外皈元寺藏經閣內翠微峯總持各等語最為案中緊要關鍵必須切實

查明庶免罅漏當密飭武漢二府督縣親往訪查武昌府洗馬池地方並無設壇傳教之人傳訊保隣僉供如一又查得漢陽府皈元寺內有藏經閣一重後豎有青石三塊直長二尺許上鐫翠微峯三字相傳為漢陽古蹟提訊寺僧據供該寺係衆姓叢林向無外人混跡慮具切結調查歷年住持僧人簿冊亦無普明之名復提前獲匪犯陳依精等研訊據供該犯本名陳汝海陝省所獲之周位掄即張利貞係葛依元即郭建汝之徒與該犯等教同派別並



無同在黃鶴樓設道至朱中立年僅二十餘歲係彭依法  
即彭超凡表弟招收為徒甫經入教取名化無並未給與  
字派因係姓朱同教之人戲呼為八牛別無取義亦非楚  
省前辦牛八教案內餘黨其武昌洗馬池地方彭依法等  
曾設立泰和公棧以為往來寄住之所係朱中立同黃致  
恭管賬後因其不遵壇上規矩業已回家委無派為總教  
主之事且朱中立係湖北沔陽州人夏長春供其籍隸湖  
南長沙更屬錯誤並究出陳依精等設壇扶乩供奉祖師

以達摩為初祖至十三祖為止其十三祖即係川省從前  
正法之楊守一徐建牧二犯除原派五行十地之外尚有  
頂航引恩保恩証恩添恩等名目但凡初入教之人名為  
衆生乩判准收者名為添恩遞層舉進因此教又名法船  
故以頂航為首引恩次之保恩証恩添恩又次之李一原  
及現獲之陳依精安依成宋依道等均為頂航之人該犯  
陳依精等又為內五行以水火木金土為序彭依法為法  
子陳依精為火精子安依成為木成子林依秘為金秘子



宋依道為土道子該犯等皆妄稱聖賢仙佛轉世煽惑愚民凡初次誘人入教先給勸善書本有玉皇心印十二圓覺悟性窮原慈航性理等經循次煽誘供奉香火授以願懺語句入教後隨時上功果錢數千文或銀數十兩及百兩不等所得銀錢互相接濟等語隨又起獲傳徒名簿一本內載四川省李一原即李依微等七十三名湖南省謝致良等五十六名江西省張尚延等十六名雲南省夏致溫等五十九名內有婦女名目據陳依精等供係同教之

人開來其中有認識者已將年貫住址註入餘僅按名照開不能深知等情旋復飭據該府縣等先後緝獲教犯陳邦定李逢友蔣九如任正祿胡注祿童風汰祈如鰲馬如山周東雲任承玉楊明善等十一名訊據供稱係湖南沅陵零陵湘陰平江湘潭及湖北江夏漢陽黃陂等縣人或拜黃致恭即黃克立為師或拜陳邦定為師輾轉相傳給與經卷教以懺語鍊習坐功運氣或止喫齋念經後即改悔出教又據江陵縣知縣昇太稟會同委員訪獲傅安桂



王大桂王士興即王新濬又名王胖子朱承恩即朱大亨  
雷曰川劉悅來即劉必選李上沓即元文劉松亭即劉宗  
書等八名並起出經卷書本信件訊據傅安桂王大桂王  
士興供俱聽從葛依元勸令吃齋拜四川人張玉堂為師  
給與經本念誦學習三皈五戒朱承恩係拜黃致恭為師  
雷曰川曾與湖南澧州人周得香在家設道劉悅來李上  
沓俱拜傅安桂為師鍊習金丹大道劉松亭僅受朱承恩  
送給慈航性理書本未曾習教並有荊州滿營閑散塔沁

布倭什洪阿領催趕春亦經朱承恩傳給經本禮懺拜燈  
之事供情俱尚游移飭令一併解省歸案審辦又准湖南  
撫臣咨會並北省委員暨該府縣等稟報先後會同拏獲  
張蔚澤即張致儉安聲翰蔡相言言致讓即言伯亭黃致  
恭李正容曾興冊陳超萬並要犯張致讓之妻黎道貞及  
其孀母周道邦安依成之妻陳正修等十一名口內惟黃  
致恭一名係北省傳教要犯因未訊取確供先將張蔚澤  
解北質審又據漢陽府督同漢陽沔陽二州縣拏獲朱中



立之胞兄朱明山並朱中立之妻朱江氏妻父江本茂彭  
依法之堂弟彭和尚訊明朱中立本名朱明先現年二十  
七歲向係種田小貿營生曾聽從嚴老么吃齋彭九盛即  
彭依法是其表兄均已外出現在情愿找交各等語情前  
來臣等查此案現獲之陳依精安依成宋依道等假託扶  
乩降神捏造妖言皆由乩筆扶出並分定字派傳徒惑衆  
已自認為內<sup>五</sup>行並頂航為首之人復造作鏡劍符籙妄稱  
可以降妖能避五魔三灾八難種種煽惑實屬狂悖不法

惟陝甘等省拏獲之夏長春等供指朱中立暗號八牛在  
武昌洗馬池設壇為總教主現經飭查並無其事即訊之  
陳依精等亦稱朱中立係彭依法之徒因其姓朱呼為八  
牛別無取義是朱中立之為總教主係夏長春等一面之  
詞與現在查審陳依精等所供情節不符但該犯夏長春  
等既在甘省供有前情恐未必盡出無因現已咨明陝甘  
督撫<sup>臣</sup>飭取夏長春等切實證據咨覆核辦至起獲名簿  
內所載各犯是否被惑入教自應一併咨緝俾淨根株除



仍飭北南兩省委員會同各地方官嚴密查拏彭依法朱中立等各犯不得稍涉縱漏亦不得株連無辜致滋擾累並照錄名單分咨四川等省督撫臣一體查緝務獲究辦外所有續獲教犯審辦緣由謹恭摺具

奏伏乞

皇上聖鑒再湖南省拏獲各犯內張蔚澤一名已先解北質審此後續獲人犯如審係在南省傳教自應各歸各省就近辦理毋庸解至湖北以免遠道疎虞合併陳

明謹

奏

四月十五日會奏七月初六日奉

湖廣督部堂裕 於道光二十五年四月十五日會同湖北撫部院具

奏續獲邪教案內夥黨提同前獲各犯審有端倪並究出入教名簿分別咨行查緝一摺今於五月十二日在漢陽蔡店舟次奉到

硃批依議認真查拏斷不可將就了事欽此



四川閣督部堂寶 為飛咨飭訊事道光二十五年七月

初三日准

兩江督部堂壁 咨據江寧府稟稱奉札以四川省掣獲

青蓮教匪犯吳懷琦供出范秉書係江南教主奏奉

諭旨嚴拏飭即拏獲究辦等因卑府遵即移營飭縣設法密拏

伏查此案前經訪獲習教匪犯劉依道等兩次具稟在案

茲范秉書既為江南教主現獲之犯必知該匪踪跡如能

詢出住址檢捕易於得手當經會同委員監提劉依道劉



昌榮並阮沅明等到案隔別研鞠僉供江南傳教之人惟朱依專由湖廣而來劉昌榮是其妻舅劉依道等均屬認識此外並無教主至范秉書不但不見其人而且不聞其名劉依道阮沅明均曾到過湖北亦不聞有范秉書名號且稱伊等已認習教斷不肯為范秉書隱瞞自取重咎等語卑府查習教匪徒有一人而屢易其名者前奉抄發兩湖稟稿有范依果即范臻到江西傳教又稱安徽傳教之人即由江西派往江南為安徽總名竊恐范秉書即范依果別號稟請咨會兩湖四川安徽江西各省飭提現獲之犯訊明范秉書是否即范依果抑係另有其人並取年貌住址確供咨覆飭發以憑查拏究辦等情到本部堂據此除仍密飭密訪查拏外相應飛咨請煩查照希即轉飭訊明見覆施行等因准此合就札行為此仰司官吏即便轉飭成都府督同委員速提現獲各犯訊明范秉書是否即范依果並取年貌住址確供詳請咨覆毋違

七月初六日奉



奏為拏獲傳教匪徒審訊大概情形恭摺奏祈

聖鑒事竊臣前因臨桂縣地當省會五方襍處恐有匪徒潛匿

飭令該府縣實力編查保甲俾游匪無從托足正在查辦

間道光二十五年四月初三日接准陝甘督臣富呢揚阿

咨稱訪獲傳教匪徒夏長春等訊認拜四川南部縣人李

一元即依微為師供奉無生老母傳習青蓮教並同教之

彭依法陳依精安依成林依秘劉依道五人在湖北掌壇

傳教李依微葛依元朱依專依果雷依真等分往各省傳



教葛依元赴廣西雷依真在兩廣等因咨移飭掣又於四月十一日准湖廣督臣裕泰湖北撫臣趙炳言咨掣獲教匪陳依精等訊明葛依元即郭建汝已不知去向係鄧依真即鄧良玉到廣西傳教等因查甘肅所稱來廣西傳教之葛依元經湖北訊明不知去向是以另派鄧依真即鄧良玉來廣西傳教當即飛飭各屬嚴掣並臣與兩司等先經訪聞有四川人鄧姓等於上年秋間來省行醫算命勸人吃素業已潛逃隨即派委因公在省之慶遠府經歷姚

井跟踪跣掣旋於四月二十日據委員姚井會同署陽朔縣陳慶桂督同臨桂陽朔各兵役在陽朔縣上步歲地方將該犯鄧依真掣獲起有經卷信稿並獲徐萬倡陶利修即曹利修張光祿即張鑑鑫張有林即鄧知禮四名提解來省飭委桂林府知府林士傳鎮安府知府糜良澤等審訊據稱查核起獲經卷內有上香上供表偈雖無違悖字句語多荒誕不經訊據鄧依真即鄧良玉供稱四川南部縣人道光十七年在本縣拜已故謝永先為師供奉無生



老母吃齋念經二十四年二月二十九日伊在順慶府會  
遇素識習教之范臻即范依果告知李一元及陳依精等  
派人分赴各省傳教定有五十字派十以元秘精微道法  
專真果成為名號五以溫良恭儉讓為名號原派赴廣西  
之葛依元已出教他去不知何往范臻現在往江西傳徒  
令伊頂受依真名派來廣西傳教兼管廣東伊即於四月  
二十八日偕范臻在重慶坐船至荊州分路伊由沙市起  
程六月十一日到湖南長沙府靜樂庵尋見傳教之彭依

法即彭超凡付給經卷表偈並令其徒弟徐萬倡帶同張  
有林即鄧知禮隨後亦來並說將來要派徐萬倡張光祿  
二人上廣東去十三日伊坐舡先行時陶利修即曹利修  
搭坐伊船彼此交好伊勸其入教陶利修聽從拜伊為師  
八月內至桂林與徐萬倡張有林同租朱姓空房暫住伊  
醫治眼科陶利修每日出門擺攤算命遇便勸人行善祈  
福冀圖誘惑因無人理會不能傳徒徐萬倡張有林旋回湖  
南向彭依法取銀接濟二十五年三月內徐萬倡同徐萬



倡之徒張光祿即張鑑鑫送到彭依法銀信告知湖北已  
破案嚴拏囑伊躲避其依真名字不可露出伊隨與徐萬  
倡等商量前赴廣東行至陽朔上步歲地方張有林趕到  
又接彭依法信亦如此說正欲逃走即被拏獲伊與李一  
沅葛依元陳伊精等均未見過尚未派人前往廣東伊在  
廣西亦未傳徒騙錢其陳依精等於各省如何派人傳教  
均不知詳細訊之徐萬倡陶利修張光祿張有林等供俱  
相符臣查該犯鄧依真向來習教復敢潛至廣西希圖傳

教惑人實屬居心鬼蜮愍不畏法據供與湖北教匪陳依  
精等並未見過不知傳教底細并到粵後尚未傳徒亦未  
派人前赴廣東均難憑信其青蓮教名并漢陽武昌湖南  
等處所設乩壇將住屋稱為雲城及匪犯朱中立之八牛  
名號俱屬荒謬復經臣督同司道委員等再四究詰該犯  
等堅供如前顯係恃無質証狡供支飾查該犯鄧依真等  
現供情形與陝楚來咨大畧相同且來粵已逾半載豈竟  
無一從習之人亟應嚴加追鞠盡數查拏辦理以淨根株



查閱楚省來咨李一沅同教之陳依精在湖北設壇傳教  
已經該省拏獲並獲夥犯多名所有廣西現獲之鄧依真  
並無夥黨可質容俟根究有無傳徒習教並飭各屬嚴密  
查訪如有被惑入教之人緝獲究明再將該犯等解赴湖  
北歸案辦理惟查楚省現在查拏教匪嚴緊其黨夥匪自  
必聞風四竄廣西各屬多與湖南界連除嚴飭地方文武  
隨時留心慎密訪查如有教匪潛入立即拏解究辦不使  
漏網外所有拏獲教匪審訊大概情形謹恭摺具

奏伏乞

皇上聖鑒謹

奏

道光二十五年四月二十八日具奏七月十一日奉

廣西撫部院周 於道光二十五年四月二十八日具

奏拏獲傳徒教匪鄧依真即鄧良玉等審訊大概情形一摺

茲於六月二十八日奉

硃批知道了欽此又於摺內廣西各屬多與湖南界連句旁奉



硃批所見甚是務當認真查緝欽此

奏為續獲教案內來省傳教要犯並拜師各徒黨審訊供  
情恭摺奏祈

聖鑒事竊臣飭據各屬訪獲習教人犯安依成之弟安海卿即  
安聲翰及言致讓等九名先後解赴湖北歸案審辦一面  
飭提已獲未解人犯質訊確供並飭各地方文武會同委  
員嚴密查拏各逸犯務獲解究等情兩次恭摺

奏明在案茲於道光二十五年五月二十二日承准軍機大  
臣字寄五月初五日奉



上諭陸費 奏續獲習教匪犯訊供解赴湖北審辦一摺該省  
現經拏獲致讓<sup>言</sup>即言柏亭等九名口並起獲經卷圖象及往  
來書信等件語多荒誕尚無違悖不法字句惟訊據該犯等  
或供業經改悔或稱並未傳徒自應歸案質訊著照議辦理  
其已獲尚未解審各犯著俟解到時提同現犯訊明實在供  
情分別解究至未獲之彭依法張致讓朱中立等即著嚴飭  
各屬勒限密拏迅速獲案究辦以淨根株而息邪慝將此諭  
令知之欽此遵

旨寄信前來等因承准此 臣查未獲各犯內張致讓即張俊一

名係據言致讓供出由湖北壇上令其頂伊<sup>致讓</sup>字派接充星

沙教主分往湖南傳教之犯尤為緊要當即飭據長沙善

化二縣會同武陵益陽等縣將張致讓并其弟張亮先後

拏獲解省並據印委各員將各省咨緝有名及現審究出

各犯夏覲牧胡正元劉濬恩即劉吉臨劉才彪林生蕭綸

甲姚金齋李廣華楊作錦王跛子即王金濬陳芳鍾周大

器文先瓊周才道謝承昂謝承昇謝承昆黃大春郭春秀



等十九名陸續緝獲解審前來臣隨提同已獲未審之黎道貞即張黎氏成章玉即高成氏鄧禮修即曾鄧氏文先祿徐持恒胡持培陳持美邵持德等到案隔別研訊據張致讓即張俊又名克廣供稱湖南善化縣人在龍洞地方居住父存母故向習外科生理張亮是伊堂弟與安依成言柏亭素識二十四年二月間安依成邀伊至湖北壇上與陳依精林依秘彭依法相見勸伊吃齋並教伊咒語令其坐功運氣默叩無生老母伊即拜彭依法為師乩筆先

名伊為克廣嗣因言致讓辭退星沙教主就令伊接頂致讓字派仍回湖南傳教伊允從回家伊孀母周氏伊妻黎氏亦均先後拜彭依法為師取名周道邦黎道貞伊旋於十月內來省租賃白鶴廟房屋作寓行醫遇便傳徒隨有善化縣人范貽福來寓求醫伊勸允吃齋拜伊為師因咒語記憶不全並未轉傳本年正月有同教人成章玉即高成氏因病來寓就醫<sup>伊</sup>治二十五日復有謝承晁同派往江西傳教之范依果即范臻同寓寄住范依果染患傷寒於



二月初一日病故是言柏亭謝承晁買地葬埋伊因省城  
信從人少傳徒無多日用不給即於二月內雇文先瓊挑  
送行李前往常德意欲行醫開道尚未傳徒即被挈獲等  
語提訊前因患病尚未取供之伊妻黎道貞亦供認拜彭  
依法為師屬實據張亮供張致讓是伊堂兄二十三年三  
月伊在鄉遇見彭依法勸伊吃齋敬神可以却病延年伊  
就拜彭依法為師二十四年二月湖北壇上派張蔚澤為  
兩山教主令伊與曾傳富夏覲牧同張蔚澤前往山東三  
月內到濟南府張蔚澤因傳徒無人旅費不能接濟寫就  
改悔信一封令伊與曾傳富同回湖北交安依成辭退兩  
山教主張蔚澤夏覲牧亦即他往分散伊到湖北陳依精  
安依成斥伊不應轉回就改派四川人徐致儉頂充張蔚  
澤致儉字派前赴山東開道仍令伊與曾傳富同往伊等  
又於七月內到濟南省客寓居住徐致儉行外科治病曾  
傳富做裁縫手藝徐致儉給伊盤費錢五千文令伊一人  
仍回湖北安依成見伊兩次空回將伊斥逐伊即改悔開



齋質之夏觀牧供亦相符又訊據徐持恒陳持美胡持培  
邵持德供稱均係拜從陳依精彭依法為師伊等雖列入  
持字行派僅止茹素入教俱未傳徒現已改悔開齋又據  
謝承昂謝承昆謝承昇供稱均與派往河南傳教之謝致  
良即謝承景係屬同胞兄弟謝承昇供認拜彭依法為師  
謝承昂謝承昆僅止聽信謝致良勸說吃齋並未拜師入  
教又據劉澆恩即劉吉臨供稱清泉縣人行醫生理父故  
母存二十三年二月內伊在湘潭縣遇見同縣人周位掄

勸伊吃齋默叩無生老母教令坐功運氣伊聽從拜周位  
掄為師至四月內前往雲南探親未遇即在彼行醫度日  
隨有昆明縣人張幗成邵東陳麻子三人先後患病就伊  
醫治伊勸令吃齋可以却病張幗成等俱聽信拜伊為師  
十二月內伊自雲南回家又勸允同姓不宗之劉才彪拜  
伊為師質之劉才彪亦供認拜師屬實又據李廣華蕭綸  
甲姚金齋林生供稱俱係郴州人均拜周位掄為師據周  
才道陳芳鍾周大器成章玉即高成氏鄧禮修即曾鄧氏



同供俱係寧鄉縣人胡正元供湘潭縣人王跛子即<sup>王</sup>全濬  
供江西廬陵縣人向在湖南裁縫生理又據同供俱拜彭  
依法為師又據文先瓊文先祿郭春秀楊作錦堅供平日  
曾吃散齋並未拜師入教各等供<sub>臣</sub>查張致讓張亮所供  
各情核與解歸湖北審辦之言致讓張蔚澤等供情大畧  
相同周位掄即張利貞亦經陝西掣獲劉濯恩等供情亦  
與咨緝來文相符惟范依果是否實已病故自應確切查  
明隨飭據長沙府督縣勘明省城南門外桐子園地方有

范依果即范臻墳塚一堆豎有石碑上刻胞叔范秦至之  
墓姪持強立等字查范依果本名范臻秦至二字合為臻  
字詰據張致讓成章玉即高成氏等堅供范依果係四川  
金堂縣人此地並無親族持強係其徒謝承晁名派捏稱  
叔姪並將臻字拆為秦至二字以冀掩飾教情等語似尚  
可信取其房地主及保隣人等供結稟送備案並即咨會  
江西安徽各撫<sub>臣</sub>查照惟彭依法朱中立二犯雖皆係湖  
北沔陽州人而彭依法來南日久現獲男婦案犯大半皆



其所傳徒衆朱中立雖從未來至湖南第係彭依法之表  
弟難保不聞拏獲嚴緊與彭依法同路潛逃轉輾避匿亟  
應不分畛域嚴密查拿以期淨絕根株不留餘孽茲據長  
沙府轉據印委各員稟報購覓眼線跣訪得彭依法有由  
常德一帶逃往湖北之信又據湘潭縣稟報查得教匪案  
內要犯葛依元即郭建汝於上年十二月初七日同伊徒  
江西宜春縣人古魁連路過該縣十總地方留住一月即  
同往江西宜春縣北門外金水地方傳教各等語當即飛

咨督臣并湖北江西撫臣嚴飭各地方官慎密截拏一面  
札飭長沙常德岳州澧州等各府州督率所屬並各委員  
勒限跟踪追緝務同咨緝有名及現審究出各教犯一併  
迅速獲案解省訊究盡法懲辦斷不任稍有鬆懈再臣現  
准督臣咨會

奏明南省續獲人犯如審係南省傳教應各歸各省就近辦  
理毋庸解北以免遠涉疎虞等因臣查現獲各犯已據供  
認拜師入教等情甚為確鑿且案內尚有婦女自可毋庸



解北訊辦倘以後續獲人犯內訊有必須解往提犯質究之處仍即遵

旨分別解究合併陳明所有續獲傳教要犯并拜師各徒黨審訊供情及現在查辦緣由理合先行恭摺覆

奏伏乞

皇上聖鑒訓示謹

奏

道光二十五年五月二十九日奏七月十九日奉

即陞同知長沙府長沙縣知縣夏廷樾署長沙府善化縣事揀發知縣曹笏謹

稟

大人閣下敬稟者案奉 憲札准 督憲咨以訪獲習教案內

要犯范依果即范臻據訊業經病故飭即前赴埋葬處所

勘訊明確取具供結申賚聽候咨送核辦等因卑職等遵

提案內已獲之張俊即張致讓及已故高明湖之妻高成

氏即成章玉查訊據供道光二十四年十月內言柏亭與

伊等租得白鶴巷李良弼房屋居住二十五年正月二十



五日有素識之謝承晁同四川金堂人范依果來寓維時  
范依果染患病症旋於二月初一日身故經言柏亭在南  
門外桐子園地方向王東曉承買山地一穴於初三日將  
范依果屍棺抬往掩埋代豎石碑一塊上刻胞叔范秦至  
墓侄持強立並刻有年月并酉山外向等字為記至碑內  
稱范秦至為胞叔並有姪持強字樣范依果並無親屬持  
強二字乃謝承晁名派叔姪俱係假稱桐子園離城約二  
里許現有碑墳可驗等情隨會同前詣該處逐一查勘有

墳堆一所碑記一座字跡與所供無異查訊保正杜之中  
及王東曉供亦相符差傳李良弼到案訊據供稱道光二  
十四年十月內言柏亭等租伊白鶴巷地方房屋與成章  
玉同居有外省人范姓來寓於二十五年二月初一日病  
故是實各等供伏查此案現經卑職等會同詳細勘訊前  
後供情如一墓碑所刊秦至二字合為臻字是已故之范  
秦至即係范臻毫無疑義除取具各結稟費 憲臺聽候  
咨送 督憲核辦外合將勘訊供情並取具供結稟費



大人俯賜查核卑職

廷樾笏

謹稟

據張俊即張致讓供道光二十四年十月內小的們租賃李良弼白鶴巷地方房屋有成章玉同居二十五年正月二十五日謝承晁同范臻來寓寄住范臻染患傷寒病症醫調不效到二月初一日病故是言柏亭向王東曉承買桐子園地方山一穴於初三日僱人抬往掩埋豎有碑記上寫胞叔范秦至墓侄持強立并刻有年月山向改臻字為秦至二字是因習教想要延年今仍病故恐人疑議所以

改名的持強二字乃謝承晁名派假稱叔侄不過掩人耳目白鶴巷并無乩壇謝承晁於范臻死後往湖北送信現在不知何往是實情願具結

據成章玉供年五十四歲寧鄉縣人丈夫高明湖已故道光二十四年十月內搬到省城與張俊租賃李良弼白鶴巷地方房屋同住二十五年正月二十五日有范臻同謝承晁來寓范臻染患寒病症醫治不效到二月初一日身死言柏亭向王東曉買得南門外桐子園山地一穴將范臻



屍棺抬到山內掩埋別的事不知道小婦人情願具結  
據李良弼供小的有自置房屋一所坐落地名白鶴菴地方  
道光二十四年十月內有言柏亭與張俊們租賃搬來居  
住二十五年正月二十五日來有范姓至二月初一日身  
故是實別的事不知道小的具結就是

據王東曉供小的有契管地名桐子園山場一處坐落南門  
外離城約二里許道光二十五年二月初二日有言柏亭  
來向小的承買山地一穴議價錢三千文初三日將范秦

至屍棺抬到山內出錢催令小的掩埋墳前豎立石碑刊  
刻胞叔范秦至墓侄持強立又刻有酉山郊向各字具結  
就是

據保正杜之中供小的住離桐子園地方不遠道光二十五  
年二月初二日有言柏亭向王東曉契買山地一穴初三  
日將屍棺一具抬到山內出錢催令王東曉掩埋墳前豎  
立石碑刊刻胞叔范秦至墓侄持強立又刻有酉山郊向  
字樣小的具結就是



為咨明事道光二十五年七月十五日准

湖南撫部院陸 咨案准

湖廣督部堂咨准四川督部堂咨具奏續獲邪教匪犯訊  
取大概供情一摺奉

上諭據吳懷琦供有范秉書其人係屬江南教主等語著湖北  
江南各督撫飭屬嚴密查拏務獲究辦等因欽此查此案前  
據長沙縣知縣夏廷樾署善化縣知縣曹笏稟訊據訪獲  
教犯張俊即張致讓及已故高明湖之妻高成氏即成章

玉供四川金堂縣人范依果即范臻又名范品書於二月  
初一日身故取具供結碑摹咨送

湖廣督部堂核辦在案查范依果即范臻又名范品書是  
否即係吳懷琦供出之范秉書除另飭再提張俊即張致  
讓等研審另行咨會外相應抄錄縣稟供單先行咨明請  
煩查照施行

道光二十五年七月十九日奉



此史二十五年十月十日

...

...

...

...

...

...

...

...

...

...

...

...

...

...

...

...

...

...

...



